

en fuoit à grosses gouttes en vn temps affés froid: Il se faisoit instruire par des enfans, escriuoit, ou plutoft faisoit des marques sur de l'escorce, pour s'imprimer dans l'esprit ce qu'on luy enseignoit; ils ont tous trois passé plusieurs nuits, ou peu s'en falloit, pour se faire dire & redire le *Pater* & l'*Aue*, & le *Credo* en leur langue, afin de pouuoir reciter [57] leur chapelet; ils eurent de grands sentimens en leur baptesme, ie m'estonnay du courage de l'vn d'eux; car deuant qu'il fust Chrestien il auoit de grandes craintes que sa femme ne le quittaft: estant baptisé, non seulement il perdit cette crainte, mais voyant qu'elle ne pressoit pas son baptesme affés fortement à son gré, il luy dit nettement, que si elle ne se hastoit de croire en Dieu, qu'il la banniroit de ses costés, & qu'il espouferoit vne C[h]restienne: Ces trois familles font pour le present regenerées dans le Sang de l'Agneau, il n'y a que la femme de Charles qui se fait maintenant instruire, quoy qu'affés lentement; c'est vn naturel brusque & agard, qui donne bien de l'exercice à ce pauvre homme: Il nous vint trouuer certain iour tout affligé; Vous m'aués dit que ceux qui font du mal y font bien souuent incités par les Demons, hélas! faisoit-il, ie suis donc tousiours avec quelque Demon, car ma femme est incessamment en cholere; i'ay peur que les Demons qu'elle retient en ma cabane ne fassent tort au bien que i'ay receu dans le saint Baptesme; & là dessus mettant les bras sur son cœur: Ie [58] vous assure, disoit-il, que c'est tout de bon que ie croy en Dieu, & que ie luy veux obeïr; & comme i'ay appris que le peché chassoit Dieu de nostre ame, quand vn autre fait mal en ma presence, ie crains que cela ne porte dommage à mon cœur.